

22 APR 2003

TLDM-Kapal (Bergambar)

TLDM SEDANG BERUNDING BINA KAPAL LAYAR UNTUK LATIHAN

PELABUHAN KLANG, 22 April (Bernama) -- Tentera Laut Diraja Malaysia (TLDM) sedang berunding dengan sebuah syarikat tempatan, Naval Dockyard Sdn Bhd (NDSB), mengenai cadangan membina sebuah kapal layar khas bagi tujuan latihan pelayaran, kata Menteri Pertahanan Datuk Seri Mohd Najib Tun Razak hari ini.

Beliau berkata, kapal layar yang dicadangkan itu panjang lebih kurang 100 meter dan berat 3,000 tan metrik akan menjadikannya lebih besar daripada kapal latihan TLDM, Tunas Samudera.

"Kapal (yang akan dibina) ini boleh melatih 100 belia dan membawa 72 anak kapal," katanya kepada pemberita ketika melawat kapal layar milik angkatan tentera laut Sepanyol, yang berlabuh di Pelabuhan Selatan, di sini.

Kapal layar "Juan Sebastian de Elcano" itu dalam rangka lawatan latihan pelayaran selama lima hari ke Malaysia. Ia membawa seramai 242 anak kapal termasuk 21 pegawai dan 43 kadet pelatih dari pasukan tentera laut negara itu.

Najib berkata, pembinaan kapal itu dijangka menggunakan reka bentuk luar negara dan akan dibina di limbungan kapal milik NDSB di Langkawi.

TLDM kini sedang menunggu kelulusan Jemaah Menteri untuk menyediakan peruntukan kewangan supaya NDSB dapat memulakan projek pembinaan kapal layar tersebut, katanya.

Beliau berkata pihak TUDM kini sedang berunding dengan NDSB mengenai kos sebenar pembinaan kapal layar itu.

"Kami masih berunding (mengenai kos). Tetapi ia dijangka sekitar RM100 juta hingga RM150 juta," kata beliau apabila ditanya mengenai kos sebenar pembinaan kapal layar latihan itu.

Cadangan untuk membina sebuah kapal layar untuk TLDM ini, katanya adalah berdasarkan arahan yang dibuat oleh Perdana Menteri Datuk Seri Dr Mahathir Mohamad sebelum ini.

Kata Najib mengikut perancangan awal, kapal layar buatan Malaysia ini akan dibina mengikut peruntukan kerajaan yang disediakan di bawah Rancangan Malaysia ke-9 (2006-2010).

"Kapal layar ini apabila siap kelak akan digunakan sepenuhnya sebagai tempat untuk TLDM memberikan latihan dan pengalaman kepada anggotanya dalam bidang pelayaran," katanya.

Katanya, banyak pengalaman pelayaran terutama dari segi penerapan nilai dan disiplin semasa belayar dapat ditimba oleh warga TLDM apabila berpeluang berlayar dengan kapal layar.

"Kapal layar yang akan dibina ini juga boleh digunakan untuk membuat lawatan muhibah ke negara-negara lain," kata Mohd Najib lagi.

-- BERNAMA

RIZ ZB